

Gronda onur per il pionier da la granezza Peer Schilperoord

■ Peer Schilperoord dad Alvagni è vegni onurà cul premi Dr. Rudolf Maag per sia endinada lavur da pionier da passa trent'onn en connex cun la cultivaziun da granezza en las regiuns da muntogna. Padruot Fried da Lavin ha salvà il pled da laud a la sedia da questa fundaziun a Regensburg, dador Turitg, nua ch'il premi è vegni surdà al meritaivel. La fundaziun Günthart-Maag onorescha persunalitads che han merits spezial pertutgant la tgira e la promoziun da plantas. L'emna passada è sa scuntrada ina quarantina da persunas en ina bellezza sala medievale sin la collina da Regensburg per undrar ils merits da l'Ollandais-Grischun Peer Schilperoord che sa fatschenta da 34 onns ennà cun la tgira, la tratga e la cultivaziun da granezza en las regiuns muntagnardas. Per il rom zunt festiv da l'occurrenza ha procurà il Trio Artemis cun sia musica animanta da Bartok, che gieva bain a prà cun las intenziuns da l'onurà: Er il cumponist gieva a la tscherterga da las ragischs sco Peer Schilperoord.

Distingui pervia da ses engaschament

«Peer Schilperoord vegn oz distingui per ses engaschament instancabel en favur dal mantegniment e la cultivaziun da granezza en il Grischun ed en l'intschess muntagnard», ha motivà Padruot Fried, agronom da l'Agroscoop a Reckenholz, la distincziun da la lavur da l'undrà, il qual vala ozendi sco expert unic en chausa en il territori da las Alps.

Il biolog ollandais è sa chasà ils 1982 en il Grischun, l'emprim a Signina, en Val Lumnezia, e davent dals 1991 è el secent ad Alvagni. Sco manader da la societad Gran Alpin, ch'el ha timunà durant passa in decenni, è el vegni con-



Padruot Fried e Katja Dutruy surdattan il premi Dr. Rudolf Maag al perscrutader da granezza grischun Peer Schilperoord.

scient da las difficultads da cultivar graun en las muntognas. Cun sia savida, si' experienscha acquistada en il fratemp e ses engaschament ha Schilperoord senza dubi contribuì decisivmain a l'actuala cultivaziun da granezza en il Grischun. «Ma el ha er collavurà cun projects naziunals ed internaziunals», punctuescha Fried, per promover la cultivaziun da granezza en il Vnuost ed en il Tirolo. En sia lavur ha Schilperoord perscrutà pliras tschients sorts da granezzas alpinas e tratg sorts novas da seghel, sorts

pli resistentas ed adattadas a las relaziuns muntagnardas. «Igl è il grond merit da Peer Schilperoord d'avair sa deditgà tant a la semenza sco er a l'observaziun minuuzia ed a la descripziun detagliada da quest tesor», lauda Fried. Questas granezzas cultivescha el en divers ierts en Val d'Alvra, en Engiadina ed en Val Müstair. Ma da gronda valor sajan er sias numerusas publicaziuns, sco per exempel sia retscha davart «Las plantas da cultura en Svizra» e ses cudesch «Metamorfosas da las plantas».

«L'onurà è s'engaschà da maniera cumplexiva en favur da las plantas da cultura en la regiun da muntogna ed è cunquai in degn meritaivel en la retscha da noss distinguids», concluda Fried sia laudatio.

Senza la granezza nagin svilup uman

En in remartgabel referat ha l'onurà alura preschentà il fritg da sias retschertgas pertutgant la granezza e sias observaziuns concernent la struttura da las plantas. Sco emprim ha el punctuà che sia lavur

saja be stada pussaivla grazia al sustegn da numerus conumans cun sumegliants ideals, sco per exempel il veterinari Hans Casper Trepp ed il pur Ueli Heinrich che avevan fundà la societad Gran Alpin ils 1987. «Senza Gran Alpin e senza ils agricolturs che cultiveschan la granezza ha mia lavur nagin scopo», conceda Schilperoord. E grazia a l'impuls dad Angelika Abderhalden hajan pudì vegnir realisads ils ierts d'exposiziun a Samedan ed a Ftan. Ils sustegniders da ses projects na savevan savens betg sche quai dettia a la fin insomma in resultat mesirabel, sco actualmain la cruschada da duas sorts da dumiech u ierti, da la quala ins na sappia betg anc sch'i dettia giotta ordlonder.

In'otra part da la lavur da Schilperoord tracta l'istorgia da la granezza en Svizra davent da ses origin. Uschia ha el constatà che las plantas da niz derivan oriundamain da la «Mesaglina fritgavla», oramai da la regiun tranter la Turchia, la Siria e l'Irak nua ch'igl era vegni scuvri che las spias da tschertas ervas sajan nutritivas. Il fatg che la granezza tgembla substanzas da reserva en il coc da farina dal graun haja la finala pir pussibilità la derasaziun e la prosperaziun culturale da l'umanità. Oramai: senza granezza nagina farina e be ina derasaziun limitada dal carstgaun.

Ils ultims trais decenni è Schilperoord er sa fatschentà intensivmain cun la parentella da las plantas, tschermond lur model da basa. A fundament da sias retschertgas davart la struttura da las plantas propona el in model nov per ils studis da la botanica moderna. En quest grà vegn il premi Maag al gidar da render pli populara la savida davart la valur da la granezza e la bellezza da las plantas.

Bartolome Tscharnet

FOTO: R. ISOVANNI